

Vasina pakich kamanchillpa yovaa Papororini kozizimon Korídshochiam yadarago anoatsi

Papororini ichtaro Korídshochiam kirakaa yadarago, Siyash napachparina, táyaro, itaro zapshtaragiya. Novaa koki mazinachpasinaya yovaa yadaragi anoatsi. Vaanaa tárash yarachpasinaya, táragiya. Ashiriy vad xiragiya tpotsia tayaspatamama. Magotari da nataragiya; Titoa Korídop zaganiragiya. Shiysha zovaa, napashintsi. Na ¿tamaragpasinaya? Shiysha mashashini, táyaro, Titorinsha ayo táragiya. Titorinsha napiashino, Paporop kanapiashino, Shiyaa kokish mazaragana. Yotaritshishimad magu kapog mantsaragosin, na kukoz yararagana. Itaro, ashpatam tpots vad shiyaa mantsir tsiyatkana. ¿Nitati Apall Paporoa tayaspatamam kamachtaragiya? da. Papor vaana zadarago, korikia potapi ato, tayaspatakiya, atssincha shiyaatsi, táragiya Papororiniatsini. Papororinsha kirakaa yadarago, Novaa koki mazaragasa, ashiriy magi kisa, táragiya. Na mosásiri siyash napchintspa. Shiyash koskachori, kapog tpotspat tsiyatchima yovapat novaa yotarit tsiyatkana anpata; vatam gichkanava. Novaa koki mazinamam gatkosin, novna vanichima, vatam Apall novaa ksotamapaniam vayaragova, yadayaro táragiya.

Ashiriya, na yovaa kamanirago anoa kamanchillpa:

- A. 1.1-2 ¿Tamarimsa, siyaa? Isoschichis.
- B. 1.3—7.16 Na kamanchintspa yovamad siyash napamam zapshtaragina anoatsi.

1.3-11 Nov kiyogota kachiykori, itaro Apall novaa itamsamam istakiya. Na yovamon novaa istako anomon nov siyaam istamam varitartamana, vatam yasakinava.

1.12—3.18 Siyash pagiyai táyaritati pinasaragina. Táragitati, itaro goti gichiragiazi. Magishi yosor chinaragori, Zapshtachshaparina, táragina. Kirakosh siyaa vaniaragori, Vaanatstari tárash yariamasa, táragina.

4.1—5.10 Novanamontaha vizporiri tayaspataki; Apall vaanatsi vizporimi novam panaragiya tayaspatamama. Isosomon vamin kiyog kachiykina. Novam tsipamam kamiranata, ashirita Apallia kok kamankina, vatam Apall iyaa itoyamachova.

5.11—6.13 Ipariapzi ashirori siyaa vaniakori atina. Novaa kizporitam chinagadama atina; novaa koki payogtsa tina. Vatam Apall novaa Isoam tayaspatampaniam inaragova.

6.14—7.16 Novaa chinapada atiazi. Itaro siyaa magis putsimam novanatsi tarashi kamankina, vatam tpots novaa yotarit inamam zadkanava. Misha, na Tit novaa kamanirago, Shiyaa kokish yadamariatsish natstaragosin, vits mazaragana, táragiya. Ashiriy nov magi kische zovallia.

- C. 8.1—9.15 Misha táchintspa; siya irosarinshochia tpots Isoschichia istagtsa; korikiriatsis panagtsa.
- 8.1-5 Mazinagtsa; masítonshoch Isoschich tpots nish Masítonash tsap pokiriavanadari takana. Ashirita, kis orkiria panaragosin, kapog xanataragana; kisha vayaraganaya otiayshochiamá.
- 8.6-24 Novsha Titoa táragina; Sirotari shiy Korídosh korikia vayamam istaragosh, da ivaparagsha. Ashiriya, natsha ivapashini, táragina Títoatsi. Ovsha ayo táragiya.
- 9.1-10 Ashiriya, siya irosarinshochia tpots Isoschichia istagtsa; korikiriatsis panagtsa. Yovari sana zadaris anoa panagtsa. ¿Mayamaha pachinozpat panachich? Magich kis panakoch, ancha vanasiri. Anogaziri zadkiya Apalli.
- 9.11-15 Ashiriya, siya tpotsia istamam vayakos, iysha Irosarinap vayachinipa. Ashkachos, tpots zapan, Apaa, shiy kizpor istaragsha; ashiri vapparía táchillinaya.
- D. 10.1—13.10 Mazinagadama Isoschichis; na minoatssha nov siyaa vanichintspa, vatam Isospotsia tayaspatampania kok ashpatamtis payoksava.
- 10.1-18 Nov Paportana; nov siyam Isostana vamachtashi. Ashiri paptsa tina; Isospotsia táyaspatampania kok payorintspa.
- 11.1-11 Siyash taragori, novam maachi pishtaragita, da siyashchia tpots minamtiyam tamontaragina. Nov siyaa kapog chinakori, gotariti tayaspatakina.
- 11.12-20 Ashiriya, siyash oro gotariti tayaspatakina. Ashkachori, ovshtisin tayaspatampan litaritamashi novash tominamam izooro pinasachpasinaya, vatam korikia potapani atosin tayaspatakanava.
- 11.21—12.10 Ovshtisin Isospots tayaspatampan vaanatsi ogirtamam kis tsiyatkanaya. Itaro, nov yovamon da kizpor taki, yovamon kiyog kachiyki anoatsim nov kamanimam chinakina. Yashigu notsiatsi kiyog yachamam kas yotamam novash vayaragiya.
- 12.11-18 Isospots tayaspatampan novaa yotaritam inaragana. Itaro siya da novaa tapachidaragsa. Novapat minamari magoaz tominkiniya; misha iy Isosshomari tachitkiniya.
- 12.19—13.10 Mazinagantsa; siyaa Isosoa izooro magoanpana atori, novanatsi izooro kamaniragina. Na tochparini siyash napchintsa. Itaro koskachori, yotaritshishpania izooro vanichima.
- E. 13.11-13 Ashiriya anoatsimari kukoz siyaa kamanpi atori yadaragina. Táragiya Papororini.

Papororini kozizimon Koridshochiam yadaragiya tsibonorinshtini.

Nov Papori siyam Koridshochiamis yadakina.

1 ¹¿Tamarimsa, Isoschichis; taris? Nov Paportana sori. Apall vaana zadarago, Isosoa táyaspatampaniam novaa inaragiya. Zovall Tímotiay nish novapat takiya. Nov siyam kirakaa yadayarori, zaganchintspa. Siyam koridshochiamis yadakina. Apall siyaa iposiaro, vanasir tapana ato, Isoschichiam inaragiya siyaatsi. Nia kirak yadakori, kirikshochiamtamtis ichigoroamis yadakina. ²Ashiriya, Aparich siyam vanasir istakcho, magiamis mapiym panachiya atina. Iy korakarini, Isos siyam ashtachtamparia atina.

³Apallia vanasiriam inakoni, Apara, shiy kizportishcha, táyani, vatam iyaa kapog istakova; misha magiatsini yarkova. Apallimari ashkiya, iyaa kapog nayanikiya. ⁴Iysha kiyog kachiykoni, Apall iyaa tovizportakiya. Ashirocha, Apallia nayanimarini yasakoni, tpotsia litaritaa istamam varitakaniya. Iysha tpotsia tovizportakaniya. ⁵Gotazini kiyog kachiykini, da. Isos kapog kiyog kachiyragiya. Ashiritam, iysha Isoschichiam kinaragoni, kapogtam kiyog kachiychiniya. Kiyogota kachiykoni, itaro Isos iyaa araginasha tovizportakiya. ⁶Ashirocha, nov kiyog kachiykori, gotazi ashki, da. Siyam kaminis ashkina. Siyam istapi atori kiyog kachiykina; Apallos kamogpana atori ashkina. Kiyogota kachiykori, itaro novaa Isos tovizportakiya. Anomon nov siyaa tovizportamam varitaktamana, vatam yasakinava. Ashiriya, siya kiyogota kachiykos, itaro da sabaytakos, novsha siyaa izooro istachintspa. ⁷Ashiro-

cha, vashonad kiyog kachiykoni, vashonadtam Isos iyaa tovizportakiya. Tovizportako, ¿tamariaha sabaytachich? Ashiri siyamon magi kisha, vatam Apallia da sabaytatssava.

⁸Zovallia, yovaa kiyog kachiyaragi anoa siy yasaktischa. Piy Ásiyap tsap taragori, da achim kiyog kachiyaragina. ¡Maya! yotarit novaa toshiragiya. Tsipachparina táragina. Novanitanari novaa kasiragparia. Itamsam pinasaragina. ⁹Magishi chinaragori, Nimonoritparia pachachapadanaya. Sitatstia, táragina. Itaro, Apall magiatsi putsiaragiya. Novanamoni vizporiri tamam pinasakina; itaro Apallimonarisha vizporirini takina. Apall kizporcha; tsipariatstata itoyamakiya. ¹⁰Ashiriya, Apall novaa kizpor tapachidaragiya. Tsipamam pakchimta pishtaragori, Apall vaana vatsta táragiya. Vadaritam novaa tapachidachiya. Apallimon na magi tatoragori, novaa yosor tapachidachiya. ¹¹Siy novam istagadama; Apallpat tsiyatagadama. Ashkos, vashonad yaanpata istachiniya. Vaanariya ashkos, tpots zapan novam tsiyatkosin, Apall novaa istakcho, ichigoroni magini ksachshapariniya. Ashkachoni, tpotsini ichigoroni Apalliatssha vapparia táchiniya, vatam iyaa tovizportaragova. Ashiroch Apallia vanasiriam inayani táshina.

Mazinagtsa, tsiyatssia minoa kamanchintspa; nov siyash mosásiri napiay atitati, pinasaragina. Nov siyaa itsinsarocha tsiyatki, vatam Apallia itsinsarori chinakinava.

¹²Mazinagtsa; nov oro vanasiriri itsinsaro takina; gichzia izooro gatkina.

Apall vaana novaa napko, itsinsaro kamankori, vazariatsiri tsiyatkina. Ashirocha, magi mapiyrori takina. Apall vaana novaa istarago ashkina. Chana chinatarich anoa da payokina. Itaro Apalliatsimari chínash payokina. ¹³Siro yadaragori, ashiragtamana; kamirana magoanamam anoa yadaragina. Kukoza kamapshimmashia da yadaragina. Ashiriya, novaa tarashi izooro yasapana atori, siyam na yosor yadakina, ¹⁴vatam siy novaa tarashi da kaapa yasaksava. Itaro, izooro yasayaros, yovash Isos yosor koskacho anosh novamon magis kis tachtamsa. Ashiriya novsha siyamon magi kis tachtamana.

¹⁵Ashiriya, novaa chinakpasinaya siyaa táragori, yadaragori, mosásirisha siyash napchima; siyash ichtaro pagatama, táragina; anoa chinamana chinara gitati, itaro pinasarinaga. ¹⁶Magishiritanari táragina; Siyash Korídosh napiállori, aragiamsha Masítonap tsap napchima. Shiarori, yosorsha kanapogaz siyash tam napkachori, novaa tpots istachpasinaya Otiayap tsap namama, siyaa támána táragina. ¹⁷¿Antati anoa gotazi chinaragi? ¿Antati novantaha chinakori, piy ashchima ati? da. ¿Antati novanatsi chinakori, tsibon kukoz payokori payochiazí? da. ¹⁸Apall vaana novaa magi yasakiya. Siyaa chinaragori, mosásiri siyap napati táragina. Anori nov chinaragi. Itaro siyashchimona xararagina.

¹⁹Napa, nov Isosoa kok kamankori, ¿tamaria tsibon kukoz payochia? pinasaktana kapogorita. Isos Apallcha Vipaya. Isos kok minamaritcha. Ashirocha, nova, misha Sírpáno, misha Tímotiayo, Isosoa kok kamankoni, tsibon kukoz payomam pinasakaniya. Tatsamoro takaniya. ²⁰Isos Apallia kok tatsamoragiya. Apall Isosomonari siyaa

istachintspa táragiya. Apallia ogirtakoni, Isosomon iyaa istarago anomad vapparía atoni, Apallia vanasiriam inakaniya. ^{21,22}Isosomonom kamogshishiamani vayaragiya. Vaana iyaa tiptsiriam inarago. Vaanatsi Vani iyash magini pshtaragiya. Vatacha nov tpotsiriti tápi ato ashiragiya. Ashirocha, iyaa kapog ksotho, ayamtati iyaa da kanatsipchiya. Ashiriya, nov Apallimon ashkori, siyaa ashkitamsa; gichzia izooro kasakaniya. ²³Ashiriya siyashchimón xararagori, da mosá nataragina. Apall vaana novaa magi yasakiya. Itsinsaro kamankina. Siyaa kiyog yachamam vatsta táragori, siyap da mosá napkina. ²⁴Nov kizpor korakpazi ashiro siyaa kasimam pinasakina, vatam Isosoa kok magoanaksava. Itaro, nov siyaa istakchori, kishshaparía tatsa; Isosoa kok araginasha magoanatsa.

2 ¹Chinaragi anoa kamanchintspa. ¿Mayamaha mosá napchi? táragi. Ovash mosá napkinariana, korídshoch tpots kizpor magu mantschillinaya magishi táragina. ²Siy magis mantsakchos, ¿chakaha novaa istach kis tamama? vatam siyamonari magi kis takinava. ³Anomon nov kirakaa siyam yadaragori, siyap siro zaganiragina. Kirakosh yadakori, vaniakori, korídshoch vaani yarachpasinaya táragina siyaatsi. Zapshtakori, vaana yarkosin, yotaritshishirini doniakcho, kishshapari napchina táragina. Yariamasillina táragina. Ashkachinarsin, vashonad magini kis tachpariniya táragina. ⁴Ashiriya, yadaragori, magi kapog mantsaragori yadaragina. ¿Vanipaha tanoragi? Siyagaz kaminis kiyog kachiyaragina. Yadaragori, vaani magu mantschillinpa táragiazi, da. Siyaa kizpor chinakori yadaragina.

⁵Yotaritshishpanimona tpots yovapor yotarit tarago anpor novaatssha da

tayotaritaragiya. Sanshochiatsiri kapog tayotaritaragiya. Siyaa tayotaritamana tayotaritaragiya; itaro da kaapa ztaro tpotsia tayotaritaragiya. ¿Iitaro anoa mayamaha kapog tsiyatchich? Pazitpa. ⁶Na siy vashonad shaniyaragos, tpazaragos, na varitayalltada. Magoaniallparia. ⁷Ashiri na novsha siyaa atashina; anoa mapiygtsa; anoa tpots chinagtsa. Magoa yaramam istagtsa. Donna ashkos, magu ksomish mantsako, zadsimon tsipachparia. ⁸Ashiriya, chinagtsa atina siyaatsi. Novaa koki yosor payogtsa. ⁹Napa siro nov kirakaa siyam yadaragori, zaganiragori, siya novaa koki payoragsa. Na nimon yasachima, ¿kamapa novaa koki payochillinaya? atori, siro siyam yadaragina. Iitaro na nov siyaa yasayana; siy novaa koki kis payoksa. ¹⁰Ashiriya, siy tpotsia chinagtsa; yotaritshishirinia-tsini mapiygtsa; bizagtsa. Ashkachos, novsha mapiychtamana. Novaa tayotaritaragaminariya ashiro, itaro novsha ashirita ksatam naphchima. Isos novaa kis napada atori, anoa tpots ksatam napkina; yovaa ashirago anoa bizakina. ¹¹Ashiriya siya shigtamtsa. Ashkachos, Yashig dosha siyaa kasichiya. Ashiri paptsa tina, vatam Yashig oro kasimam zadkova. Siy anoa kapog yasaktischa. Ashiriya, chinagtsa, siyaa tina.

**Mazinagtsa; minoa kamanchintspa:
Titoatssha paragori, ovsha tsiyatssia
siyamom vanasirimash kamaniragiya.**

¹²Nov Tarávtap yakat nataragori, anosh kosaragori, Apall novaa istarago, Isosoa kok kamaniragina. Tpotssha kis mazaragana. ¹³Iitaro anosh Titoam kotaragori, xapoayarallori, vatsta, táyarallori, nataragina. Apall anosh kapogta istarago, ashirita Masítonap tsap Titoa nachogatama táragina. Ashiriya, tarávtashchia tsiyatiarallori,

kasaragina. Shiarallori, araginasha Masítonap tsap nataragina. Anosh Masítonash kosiarori, Titoa paragina. Paragori, ovsha Tit ichigoro novaa kamaniragiya tsiyatssiatsi siyamona.

¹⁴Natsha nov magi kische. Apall siyaa istarago, yotaritshishia kasaragos, Apallimarisha kasiragiya. Apall kizporcha. Ashirocha, novaa Isos oro istako, novamari yotaritshishia kasikina; Isos kok magiatsini kasikiya. Tpotssha anoa paksin, ponirostakanaya. Isosoa kok kamankori, izapaniakori, Isos kok tpotsia zapan istakcha. Kzammash tamapari ashiro topakiya. Tpotssha Isosoa kok magoankosin, ashkiya. ¹⁵Nov ashkori, Apallsha novaa kis napkiya. Isosoa kok kamankori, tpotsiam ichigoro kamankina; kamogartachillina anoatstam kamankina; misha yovamtam da kamogartachillina anoatstam kamankina. ¹⁶Kamankori, ashpatam tpots magoankosin, Isososh kamoganaya. Iitaro ashpatam tpots gatkosin, Yashigopsha nachillinaya; izoromamari tsipachillinaya. Nitati novanamon vizporiri Isosoa kok kamanimam varitakiazi. Nitati novana zadki anoa ashiragi, doni. ¹⁷Apall vaana novaa kamachtarago, itsinsaro Isosoa kok kamankina. Vaniarodama atori, itsinsaro kamankina, vatam Isos novaa ichigoro pakova. Iitaro litarit tpots zapan yovaa vaana zadkana anoa kamankanaya. Korikia potapani atosin ashkanaya. Iitaro nov ashimam zadkiazi, da. Nov Isosomon itsinsarori chinakina; itsinsartam Isosoa kok kamankina. Ashiri ashkori Apallia kok tayaspatakori takina.

**Mazinagantsa; minoa táchintspa.
Apall vaana novaa kamachtaragiya
Isosoa kamanimama.**

3 ¹Kirakosh anoa siyaa na kamankori, novanatsi ogirtamam da atina. Siyashoch tpots novaa chinapada atiazi

ashki, da. Min litaritin tpots tamapari ashimam zadkiazi, da. Ovshtisin koridshoch novaa chinapada atosin, kirakaa vaanatstin kok litaritap toyadayarasin, payopayorsin, siyash kosaragana. ²¿Anomashia kirak nov mayamaha payokori payochi; vatam nov ichtaro siyaa Isoosa kok kamaniragori magoanaragsava? Anoa bizamam pinasakina; anoa izooro yasakina. Misha, magoanaragis anoa tpots ichigoro natstakanaya. ³Tpots ichigoro, Paporcha koridshochia kamaniragiya Isoosatsi koko, novaa atanaya. Ashiri yasaktamanaya. Siy Isosopaz yadamarini kiraka ashiro siy novam taksa. Apall Vani magimonis kirakamon yadatarich ashiragiya. Isos vaana magiatsis yararago, Apalltatiya anoa da bizachiya. Patobchimonta yadayaroch, pastamam tariya. Itaro siy magoanaragis anoa pastamam vanintaha. Ashiroch nov Isostana tayaspatampantana tina.

^{4,5}Anoa goti tiazi, da. Isos vaana novaa tayaspatampanim inaragiya. Apall vaana novaa yasariya. Ashimam novanitana varitariazi; pinasaktana. ⁶Itaro Apall vaanatsi vizporirini novam panayaro, tayaspatampanim novaa inaragiya. Yovamad Isos iyam yotaritshishirini tsiparago anomad Apall na kukoziya kaniasisch vayaragiya. An kukoziya kaniasisch tarashipancha; kizpor vanasiriya. Itaro, kukozi sirapoch vanimpancha. Sirotama Apall vaanatsi kok patobchimon yadaragiya. Nia kukozi da payokos tsipatsa, taragiya Apalli. An kukozi vatacha sirapchiya.

⁷Mazinagantsa; kukozi sirapoch an yotaritamona; vanasirimoncha. Sirotama Apall vaana patobchimon yadayaro, chiyam panaragiya. Móysisariniamani panakcho, Apall kizpor husiniaragiya. Natomasamta Apall husiniamarini Móysisarinshini

pshtorago, ashiro otiayshochsha tpots Móysisariniansini napamam ksimonoragitamanaya. Itaro Apall husiniamarini zapshina Móysisarinshini pastaragiya. An kukozi sirapoch vanimpaniri taragiya. ⁸Itaro, natsha kukozi kaniasisch, tarashipan kosarago, ancha kizporinasha vanasiriya; vatam kamogshishiamani vayaragova. ⁹Ashiriya, kukozi sirapoch vanasirimana vanasirimoncha. Itaro kukozi kaniasisch kizporinashacha vanasiriya. Anoa kok chiy magoankoch, Apallsha chiyatssha kis chinakiya. ¹⁰Ancha ksomish vanasiriya. Ashirocha, na kukoziya sirapchia yabotakpaz shiario, anomonsha kukozi sirapoch dosha varitariya; pastayalliya. ¹¹An kukozi natomasam vanasirimshirini husiniaragiya. Itaro, natsha kukozi kaniasisch vanasirimshirini araginasha husiniakiya, vatam in pastamam doniva. Kukozi kaniasisch orotamari tachiya.

¹²Ashiriya, in kukozi kaniasisch da pastacho, iyam kamogshishiamani vayarago, ¿anoa mayamaha nov pazichi? ¹³Móysisarinini tamaragpari ashkiazi, doni. Ovshacha Móysisarinini yovaa husiniamarini tsipatano anoa tpots pakchosin, pagtapa ato vaanatsi vach kamispat kamanaragiya, vatam Apall husiniamariniatsini da orotamari panaragova. ¹⁴Ashiriya, an kukozi sirapoch pastacho anoa ipishogaragiya; tpotssha da izooro yasaragana. Vadaritam an kukozi sirapoch pishompaz ashkiya; kamis tamapari ashiro vad kámanakiya Móysisariniansini koko. Otiayshoch vad magoanamam pinasakana. Itaro Isoosa magoankoch da ashikchi. Kukoziya sirapchiatsta magoanakchi. ¹⁵Itaro, otiayshoch Isoosa donna magoankosin, vadaritam anoa kukozi sirapchia da izooro yasachillinaya; vad kamispapaz kámanako ashkiya. ¹⁶Itaro, Apallia tasaskatssin,

pishom donshaparia; donpaz kamis kámanaro ashchiya. ¹⁷Ashirocha atashina; Apall Vani magiatsich putsiakcho, xarashish donshaparia; kukoz sirapoch chiyaa dosha vanichiya.

¹⁸Ashiriya, iysha kamis donpaz kámanaro ashironi, Isosoa vizporirini izooro yasakaniya. Isoso Apallcha Vipa. Isosoa vanasirimshia magoankiniya. Ashkoni, Isos tamapari ashiro kinakaniya. Isos vanasirimshirini iyash da pastachiya; itaro araginasha araginata ashkiya. Apall Vani oro magiatsini ashkiya. Anomad Isosoa kok kis kamankina.

4 ¹Ashirocha, Isosoa kok da sabayta-kina. Apall vaana zadiaro, novaa nayaniro, Isosoa kok tayaspatampaniam novaa inaragiya. Ashirocha kis tayaspatakina. ²Ashirocha, yotaritshishia izooro kapiataragina. Ashiragori, pishomam doncha; pazimam dontamcha. Gichkitamtazi; tamapigaktamtazi, doni. Apallia kok piyari da kamankina; itsinsaro kamankina. Isosoa kok itsinsaro payokina. Ashkori, tptossha mazinaksin, Zorkiya: Papor Isosoa kok da gichkiya, novaa: atanaya ichigoro-sina. Apalltatiya novaa: Itsinsaro kamaniksha, atitamcha. ³Ashirocha, tptots magoanamam pinasakinari, vaanamontari ashkiya. Vaantari pinasakiya, vatam yashigop namam zadkova. ⁴Yashigsha vaanatstari chínash tptososh magu vayayaro, tptotsia magoa pakchiampaz ashiro inayaro, magshartayaro, magoanamam toxarako, çtamariaha magoanach? Isos kok tptotsia magu tovasiniakpaz ashkita, itaro Yashigu toxarakiya. Itaro, Isosshacha kok tptotsia magu tovasiniakiya. Isos kizporcha vanasiri; Apall tamapari ashiro husiniakiya. Apalliatssha izooro iyaa yamadakiya. ⁵Ashirocha ashko, Apalliatssimari kok kamankina. Novana

chinaki anoatsiaha kamanki, da. Kaman-kori, Isos Apallcha Vipa; chiyaa izooro kasikiya, oro novatina. Itaro novoro siyam mchach tamapari ashitana; Isos vamin siyaa istampan takina.

⁶Mazinagantsa: sirotama Apall tsaporonasia tinarago, Tonimaa zar tovasinichpa, táragiya. Natsha abtampaz ashiragtam Apall magiatsini tovasiniakiya. Shiaro, iysha Isosoa kok magoankiniya. Ashkachoni, Apallia vanasirimshirini izooro yasakani, vatam Isosomonari Apallia yasakaniva.

⁷Itaro mazinagtsa; Isosoa kok tayaspatampantati takori, ashirita kizpor da takina. Morits tamapari ashiro mosástana. Apall vaana ashiro vayaragiya. çAntati novanamontaha vizporirini tayaspataki? Apall vaanatsi vizporirini novam panayaro, kizpor istako, tayaspatakina; Apallimona da sabaytakina. ⁸çNovaa vanipaha kiyog yachakana? Itaro Apall novaa istarago, novaa da kasikana. çVanipaha tamachiazí tát ashki? Itaro, Apall magiatsi putsiaiko, oro magi da pachirogakina. ⁹Novaa natsaksin, pachamam zadkitatssin, itaro Apall novaa da mago kasakiya. Novaa potayarosin, novaa pachamam pakchita pishtako, itaro Apall vatsta ato novaa da izooro pachakanaya. ¹⁰Oro Isos tamaragpari ashiritam kiyog kachiykina. Novanatsi napkori, Isos vamin tsiparpazi ashkina. Ashiritatiana ashiro, itaro Isos vaana notsiatsi sotko, kchit ashkina; itoyamakpaz ashkiya novaatsi. Siy Isoschichis anoa yasakinariasa ashiro, Zoraktishcha; Isos Vaparish kizpor takiya, tátssa. ¹¹Ashiriya, iy Isosoa magoankoni, oro kamiran tsipamam varitakaniya. Oro Isos vamin iyaa pachamam zadkanaya. Ashirita, Isos vaana iyaa tapachidako, vaanamon vizporirini kchitakaniya. Notsiatsini

kocharimashiatsta itoyamakpaz ashkiya. Yovamon Isos iyaa istako anomon ichigoro tpots Isosoa tárash yasachillinaya. ¹²Ashirocha, nov siyaa Isosoa kok tayaspataki anomad kamiran tsipachina. Itaro, tayaspataki anomon Apall siyam tarashia orotamashia vayamtamcha.

¹³Napa sirotama zitamin kirakamon yadako,

Vatam Apallimon magi tatkinava, ashirocha Apallia kok kamankina, táragiya. Nov ashiritam na Apallimon magi tatkori, kamankina; da sabaytakina, ¹⁴vatam Apall iyaa itoyamachova. Vaana Isosoa itoyamaragiya; shiartam iyaa itoyamachiya. Iyaa itoyamayaro, vashonadari nov siyaptatam Apallosch tachiniya. Kisshaparia tachiniya. ¹⁵Ashiriya, siyam kaminis kiyog kachiykina. Tpts Apallia vanasiriam inpana atori, siyam kamankina. Isosoa kok araginash araginash izapaniakori, tptssha zapan Apallimon magu tatochpasinaya. Ashkatsin, tpts zapan Apalliatssha: Vapparia, Apaa. Shiy kizportishcha. Shiy iyaa kapog istaragsha, táchillinaya; Apallia atosin vanasiriam inachillinaya. Anoam Isosoa kamanimam da sabaytakina.

¹⁶Ashirocha, notsini kocharimashcha; tsipamam varitacha. Itaro, ashirita Apall magiatsini magoanamam yanischikiya. Potam yosor potam vizpoririamani araginasha vayat vayat ashkiya. ¹⁷Natomasamam kiyog kachiykiniya. Itaro, ¿anoa mayamaha chinachich? vatam Apall vanasirimshiriamani orotamashia vayaragova. Ancha kizpor vanasiri. ¹⁸¿Mayamaha maachi patarich anogaz chinachich? vatam mago pastachova. Itaro, Apall iyam vayarago anoa donta pakoni, ashirita chinakaniya, vatam da pastachova; orotamari tachova.

5 ¹Yov da pastacho anoa pakich kamanchintspa. Apall iyam notsiatsini da kochataro anomash panacho

anoa chinakoni, Apallia kok da sabaytakaniya. Notsini kocharimash tsipakchita, kanochakchita, itaro kanini Apallip nakchoni notsini mochasishiamsha notsianchiniya. Apall vaana iyam vasina vayaragiya; orotamashiam tamam vayaragiya. ²Natomasam kiyog kachiykini. Itaro, tarashiamani da kochataro anomashigaz yagsani atiniya. ³Yakchoni, kamariampazini ashiro da pazichini, vatam tarashiamani da pishtachova. ⁴Natomasa nish tsaposh takoni, magini mantsakani. Notsiatsini kanochamam da zadkiniya; tsipamam gatkiniya. Notsiamani da kochataro anomashigaz yamam kizpor zadkiniya. Datta tsiparoni, yamam zadkiniya. Ashkachoni, kochashimonsha da kiyog kachiychiniya; orotamarisha kis tachiniya. ⁵Apall vaana zadarago, iyam ashimam vayaragiya. Zorko atiya, vatam Vaanatsi Vani magishini pshtaragova. Apall Vani iyash pshtoyaro, iyaa oro yasakiya. Vatacha nov tptsiriti tápi ato ashkiya; da kochataro anomashia izooro iyam panachiya.

⁶Ashirocha anoa yasakorini, da sabaytakani. Vad nish kocharimashosh takoni, mochasishiamsha yamam pinasakaniya, vatam Isososh da takaniva. ⁷Natomasana Isosoa da pakaniya. Ashirita, donta pakoni, Isosomon magini tatkini. ⁸Ashirita, da sabaytakani. Kocharimashia kasamam zadkiniya. Ashkachoni, Isososh tachiniya. ⁹Itaro natoritana ashimam pishtakaniya. Ashiriya, Isos iyaa kis napada atoni, da sabaytakani. Natomasam nish kocharimashosh takoni, Isosoatsimari chinakani. Zapish ashtachtamaniya; da kochataro anosh takchoni, Isosoatsimaritam chinachiniya.

¹⁰Ashirocha vanasiri takaniya, vatam Isos iyaa ichigoro yasachova. Ichigoroni Isosoa tasaskachoni, Isos iyaa

natstachiya. Vadaya nish kocharimashish yotarit taragoni, yotarittam iyaa pagchiya. Vadaya vanasiriri taragoni, iyaa araginasha vanasiriam inachiya.

¹¹Ashiriya, anoam Apallia ponikaniya. Ashirocha, nov ponikori, itsinsaro takina. Ati an kamankori, tpotsia zorkori atina; gichkiazi, da. Apall vaana magiatsi yasariya. Daba siy yasasa; novaa yasaktampasa. ¹²¿Nitati siyaa koridshoch novaa chinapada atiazi ati? da. Siyaa magis putsimam novanatsi tarashi kamankina. Ashiriya, siya tpotsia kamiran yamiaros kamanitssa. Vatam tpots novaa yotaritam inamam zadkanava. Ovshtisin tpots potitimon magu chinaksin anoatsimari chinaragana. Vaanatstamari ogirtakanaya. Itaro yovaatssha chiy chinakich anoa da natstakana; tarashiatsich itsinsaro takich anoa da yasakana. ¹³Magsharitcha novaa atanaya. Vaani antapana atina, vatam Apallimon vamin moxariampaz ashiro kinaragina. Itaro siyam kaminis nov magipti takina. ¹⁴Apall Vip iyaa ksomish chinaragiya. Ashiri anomad magipti itsinsaro takina. Apall Vip iyaa kizpor chinarago, iyam yotaritshishirini tsiparagiya. Minamarita tpots, itaro ichigoroamani tsiparagiya. Ashiriya, ¿iysha mayamaha yotaritshishia yosor chinachich? da; vatsta. ¹⁵Natori nish tsaporonasosh takoni, yovari yaana ashimam zadkini anoa pinasakaniya; ashkoni yotaritcha. Itaro, Apall novam vanasiri tapana ato, Vipaa iyam topcharagiya; iyamsha vanasir tamam yosor itoyamragiya.

¹⁶Ashirocha, anomon, Isosomon vamin, nov tpotsia da ivaziri chinakori, zorompatari chinakina. Sirota Isosoa ivaziri yasaragori, natsaragina. Itaro natsha izooro magoaniana. ¹⁷Ashirocha, tpots Isosoa magoanko, tárash ichigoro kaniashiamsha kinakiya. Tárashsha

sirapoch pastakcha; itaro kaniashishia vanasiriri takiya; Apalliam vip kinakiya. ¹⁸Apall vaana iyaa kaniashiam inakiya. Siro iy Apallia kodartaragitatani, itaro Isossha kosarago, iyaa kukoz yarakpaz ashiragiya; anosh iyaa tatsoyaragiya. Shiartam, Apall vaana novaa Isosoa kok táyaspatampaniam inaragiya. ¹⁹Apall vaantari ztaro tpotsia tatsoyamam zadarago, Isosoa zaganiragiya. Isossha iyamad yotaritshishirini tsiparago, tomashiriniatsini ichigoro tovaparagiya. Anomon Apallsha iyaa kis chinakiya. Shiaro, anoa tsiyatsis novash vayaragiya. Shiysha tpotsia novaa koki kamanigcha táragiya novaatsi.

²⁰Ashiriya, novsha Isosoa kok kamanikina, vatam Apall vaana novaa kamachtaragova. Isosoa magoanagtsa táta ashkina, vatam Apall vaana táragova. Apallpat ttsoyagtsa; Apalliam vip kinagtsa tát ashkina tpotsiatsi. ²¹Isos donta yotaritshishia payorago, ashirita Apallsha yotaritshishpaniatspaz ashiro Isosoa vaniakpaz ashiragiya. Ashiriya, Isosomon Apall iyaa kis chinakiya; vaanatsi vip, Isosoa tamapari ashiro iyaa kis chinakiya. An vatacha tpotsia kamanki ano.

6 ¹Ashiriya, nov Apallia istakori, nov siyaa vaanatsi kok Apallia kamankori atashina; Paptsa; siy yovaa Apall Isosomon chiya nayanirago anoa mazararagos, ivaziri gotis magoanintspa; izooro magoankos itsinsartam tagtsa atina. ²Gatintspa; natorit in magoanagtsa. Natori Apall siyaa kotakcha. Zapshina paptsa tina. Vaana Apall attada;

Siy novaa mashkos, istada atos, nov siyaa istachintspa; tapachidachintspa, vatam natomasina siyaa nayanikinava. Siyam kamogshishiam vayaragina; zapshina tstsachparia

atcha Apalli koko. Ashiri natori magoanagtsa atina.

³Misha, tpots novaa yotaritam inarodama atori, vanasiriri takori yapstakina; xarashish doncha.

⁴Apalltana vamachtashi. Apall vamin kiyogota kachiykori, ashirita da sabaytakina. ¿Novaa vanipaha kiyog yacharagana? ⁵Novaa pzkoaragana; potaragana; tsagaragana; tomanaragana. Apallia kok kapog mapiakori, kanosamam pinasaragina. Mapiakori tarasiaragi; misha mariz kayataragina.

⁶Apallia kok kamankori, vanasiriri taki; magipti takina; magoankina; apill tayaspatakina; tpotsia nayanikina. Apallimon Vani kizpor takina. Tpotsia vanasiri chinakina. ⁷Apallia kok itsinsaro kamankina. Apall vizporirini novaa istarago, tpots zapan magoankana. Ashkori, tpots novaa yotaritam inamam pinasakana; misha novamona-

tam yasaksin, tpotssha novaa koki mazinaksin, Apallia magoankana. ⁸Ashpatam tpots novaa kis chinakana; ashpatam novaa natsakana; ashpatam novaa yotaritam inakana. Novaa vayagichiriamta inaksin, ashirita itsinsarori kamankina; gichiz doncha. ⁹Tpots ichigoro novaa yasaktatssin, itaro novaa nirkana. Novaa pachamam zadkitatssin, vad kchit takina. Novaa kizporita vaniaksin, itaro pachamam xapoakana. ¹⁰Magi mantsaktati, itaro oro Apallimon magi kis takina.

Pokiritati takori, itaro tpotsia zapan istakina Apallia magoanamama. Donta maachi pakchiyam payokori, ashirita novam pishtats donpaz ashkiya. ¹¹Mazinagtsa nov siyaa koridshochiatsis kizpor chinakori, itsinsaro kamani-ragina tarashiatsi; izooro kamaniragina. ¹²Nov siyam da pakchiyam kamapshiragina; siyaa niraragiazi, da. Itaro siy novaa niraragsa. ¹³Shirintspa. ¿Mayam-

sha novaa pakchim chinaksa? Nov siyaa chinaki ashiritam da siy novaa chinaksa. Ipariapzi ashirori siyaa vaniakori atina. Novaa kizporitam chinagadama atina; novaa koki payogtsa tina. Vatam Apall novaa Isosoam tayaspatampaniam inaragova.

Mazinagantsa: minoa siyaa vanichintspa; tpots Apallia da magoanko anpat kizpor amikortarintspa; misha gosirtarintspa yashighchichpata. Ashkachoch, ¿tamariaha kis tachich?

¹⁴¿Tamariaha yotaritshishpanpat vanasir tachich? ¿Antati kashchir psanpat vashonad tak? da. Chiy tpotsich Apallchichich yashighchichpat takoch ashikpaz ashiktichcha. ¹⁵Min tpots Isososh tachiko, minsha tpots yashigosh tachitco, ¿ashiro tamariaha minamari magoaz payochich? ¿Antati pakchiyam tatsamoro chinachiazich? dabaria. ¹⁶Apall vaana iyash magini tako, Apallpaz pago ashiro takani. ¿Tamariaha apallpots iyapta iponach? Kapogori pinasakiya. Apall vaana táragiya;

Nov siyash takori, siysa novaa Apallcha tátssa; novsha siyaa tpotsirtana táchina. ¹⁷Ashiriya, tpotsia yotaritamashia ksagtsa; anosh tarintspa atina, atcha Apalli. Yotaritshishia izooro ksagtsa. Ashkachoch, nov siyaa kis napchintsa. ¹⁸Siy novaa apartana tátssa; novsha siyaa ipartana táchtamma,

táragiya Apalli. Apall vaamari kasiro an da mago atiya.

7 ¹Ashiriya chinaki anis; Apall anoato, siyaatstam magoanamam atiya. Payomam varitariya. Yotaritshishia ichigoro ksagtsa. Magiatsis yotaritiantspa. Notsiatstamtis

yotaritiantspa. Yaragtsa. Vanasiriri tagtsa, vatam Apalliatsimari chinamam varitakova.

²Ashiriyá zovallia; novaa niriyspa; chinagadama.

Nov da minamtiyam tpotsia tayotari-taragina; yotaritshishosh da tapshoragina; misha da shochiragina siyaa maachiritis. Ashiri ñmayamadsha da novaa chinaksa? ³Nov siyaa gotiriti tina, vatam siyaa kizpor chinakinava.

Ayamtati siyaa bizachiazi, da. Siyaa istamamari takori takina. Siyamad kaminis tsipaniatstati da pachidkina. ⁴Nov siyamon magi tatkina; siyamon kizpor takina. Kiyogota kachiykori, ashirita magi siyamon shabataktana. Siyamad kaminis vadaritam kiyog kachiykina. ⁵Nish araptati takori, siyamad kanosamam pinasaragitamana; vadaritam kiyog kachiykina. Piyartach tpots novaa toxararagana; Isoschichimad tpots magi mantsaragina. Isoosa kok kasatssinti siyaa tori, magi mantsaragina. ⁶Itaro, yovapor ashiragi anpor Titsha kosaragiya. Apall novaa kizpor istaragiya; magiatsi tovizportaragiya. ⁷Titoo paragori, magiatsi itsitchiragiya. Itaro, Titsha siyashchia tsiyatsis kamani-rago, magiatsi izooro yararagiya. Novaa kamanko, Koridshoch shiyagaz kizpor zadkana, novaa tárago. Misha, kirakariatsish natstayarasin, yotaritshishimad kapog tanoragana. Misha, shiyaa chinaksin, tapachidamam zadkana, vatam tpots piyartach shiyaa yotaritam inamam zadkanava; táragiya novaatsi. Anoa nov mazararagori, magi ksaragina.

⁸Siro kirakaa mino siyam yadaragori, siyap zaganiragina. Siy anoa natstara-gos, novaa koki mazararagos, kizpor magis mantsaragsa. Anomad magi mantsamana mantsakiazi, vatam anomad yotaritshishia izooro kapiata-

ragtsava. Magi pakich mantsamana mantsaragina, vatam natomasam magiatsis tamazoboraginava. ⁹Itaro, natsha nov magi kisha, vatam yotaritshishia kasaragsava. Magis mantsaragos, Apall magiatsis putsiarago, yotaritshishia kasaragsa; Apall siyaa istaragiya. Ashirocha, anoa kirak yadaragori, da siyaa tayotaritara-gina; siyam vanasiri tamam istaragiya. ¹⁰Tpots chiya vaniako, Apall magiatsich putsiyaro, yotarit takich anomad magich mantsakchoch, kasakchoch, anacha chiya kapog istakiya. Tarashiatsini itsinakcho, ashiri Isososh kamogchiniya. Ashkachoni, pazimam doncha. Itaro, Apallia donna chinakoch, tpots chiya vaniako, yotarit takich anomad pazikoch, tsiyansimonari tsipachchi. ¹¹Itaro, itamaro Apall siyaa istaraga! Apall magiatsis putsiarago, magis kizpor mantsaragos, siya mapiyragiazis, da. Mikiaro yararagsa. ñTamakoni iy ashkiniya? táragos, Yotarittanicha iya; vatsta, yotaritshishiriniatsini izooro kapiatiani, táragsa siya. Apall vaniarodama atos mikiaro yararagsa. Novagaz kizpor zadaragos, yotaritshishpania tpots da nayaniragos, vaniaragsa. Yotaritshishia na izooro kapiataragos, magiatsis yararagsa; vanasiririsha taksa. Yogpaktischa. ¹²Ashirocha, novsha: ñKamaparia koridshoch novaa chinakiasinaya, novaa koki payochillinaya? atori, anoam kirakaa yadaragina. Yotaritshishpania vanimam zadamana zadaragina. Misha tpotsia tayotaritarago anoa istamam zadamana zadaragtamti, yadaragina. Itaro, kaapa siyaa izooro yasamam zadaragori, yadayarori, zaganiragina. Kamapa Apallia chinakiasinaya vaanitari magosh chinachillinaya atori, anoam kirakaa yadaragina. Na sanitari yasaragsa. ¹³Nasha in tsiyatsis kosiario,

mazinayarori, siyaa izooro yasayana. Ashiri na magi kisha. Mapiychtina.

Misha, siy Titoa kapog istaragos, anomontam nov magi ksaragina. Tit siyash magu kis taragiya. ¹⁴Doma siyap nacho, nov Titoatsi: Koridshoch tpots Apallia kok izooro payomam zadkana; kasamam da zadkana, táragina. Ashiriya, Tit siyash naparago, siya Apallia kok kis payoragos, novaa vayagichiririam da inaragsa; na novam pazimam doncha. Napa nov siyaa oro itsinsarori tsiyatkina; gichkiazi. Ashiritam nov Titoa itsinsaro tsiyatagina; siyaa itsinsaro kamaniragina. Siy anoritam payoragsa. ¹⁵Anomon Tit siyaa kizpor chinakiya; siyaa bizakiaha. Tit novaa kamanko táragiya; Koridshochish kosiaramchori, novaa chinargana. Shiyaa kokish yadamariatsish pónirpata mazinargosin, itaro mikiartam vits mazinargana; shiyaa kokish payomam da gataragana, novaa táragiya kamanko. ¹⁶Ashiri nov magi kisha. Yogpaktischa siya. Nov siyamon magi tatkina. Siyaa da pakchiyam pazikina.

Ashiri yovaa yotaritshishiriatsis kapiataragos, nov magi ksaragi anoa kamaniana.

8 ¹Misha mazinagantsa; masítonshochia tpots kamanchintspa. Isoschich tpots nish Masítonash tsap takana Apall vaana istaragiya. ²Nishoch Isoschich tpots da achim kiyog kachiykanaya. Pokirivanadari takana. Ashirita, kis orkiria panaragosin, kapog xanataragana; pachidaragazillinaha, da; kisha vayaraganaya. ³iMaya! vayayarosin, kizporita pokiriav taksin, ashirita aragitama katatam vayat vayat ashiragana. Vaana zadaragsin, ashiraganaya. ⁴Novaatssha tamontaragana; Niava; yancha; gatillpa. Iysha istamam zadkitamaniya. Nipta irosarinshochia

Isoschichi tpots istashini, novaa táraganaya. ⁵Ichtaro magishi goti chinaragori, aship in vayachpasinaya táragina. Itaro anoa kapogori yanoro panaragana. Apallia kizporinasha chinaragosin, orkiriatssha kis panat panat ashiraganaya. Apall vaana magoats putsiarago; ashirop ashiragana.

⁶Ashiriya, novsha Titpat tsiyatarina. Zovaa Titoa, shiy Koridap yosor nachcha. Sirotari shiy anosh korikia vayamam istaragosh, da ivaparagsha. Ashiriya, natsha ivapashini; koridshochia yosor istashini, nov táragina Titoatsi. Ovsha ayo táragiya. ⁷Siy Apallia kok kis magoanaksa. Siy Apallia kok kapog yasakos, kis kamaniksa. Oro istamam zadaksa. Siy oro novaa chinaksa; novsha siyaatstam chinakina. Ashiriya, na korikiriatsis mapoyaros, tpotsiam istamam vayakos, orotari shigtsa; pchidintspa tina.

⁸Mazinagtsa: nov siyaa da kamachtakina. Goti siyaa tamontakina. ¿Kamaparia Isoschichia istachillinaya? goti siyaa atina. Isosoa izooro chinakinariasa, kishshapa istatssa. ⁹Magiatsis putsichintspa. Isosoa iycha korakarini. Isos iyaa ksomish chinaragiya. ¿Ovam mayaha pishtarag? Kizpor taragiya. Kizporita tarago, ashirita siyam kaminis pokiriampaz ashiro kinaragiya; tpotsiam kinarago, siyam tsiparagiya. Anomonari siya irikoam tamapari ashiro kinatssa; vatam Apall siyam vanasirimshia ichigoro vayaragova. ¹⁰Ashiriya, nov siyaa da kamachtakina; gotariti chinaki anoa kamanchintspa. Minosh masach sana zadaragos, anshochia tpotsia istayani táragsa. Doma lllitaritshoch tpots istamam chinatssin, siyaa oro zadaragsa. ¹¹Ashiri novsha atashina; vayamam ivapagtsa, vatam tpotsia istayani kis táragsava. Natsha kstatam izooro istagtsa. Ichigoro tpots vaana

yasachillinaya. Vadaya zapan payoro, kapog istachima ato, vaana yasachiya. Vadaya pakich payoro, ashirita pakich istachima ato, vaana yasachiya.

¹²Ksanari panakos, Apallsha siyaa ksatam napchiya. Yov payokis anchich yayaros, panamam varitakiya. Itaro, morkirish takos, Apallsha mapiykiya, vatam oro yasakova. ^{13,14}Apaz tpotsia kapog istakos, korikiriatsis izooro tochigkachos, yotaritparia. Siyam kapog pishtakcho, kiyog kachiyatssa. Itaro, natori siy korik payomana payokos, tpotsia istamam varitaksa. Ashkachos, sama da pishtachiya; ovamsha dontam pishtachiya. Tatsamoro payotssa; sanpata Isoschichpatatis istatssa. Zapish siyam pishtakchinari ashiro, ovshitsin irosarinshoch tpots siyam istachtampasi-naya. ¹⁵Ashkachos, Apallia kok tatsamochpasa, vatam Apall vaana atova;

Tpots zapan potaksin, vaamata mago da xanataragana; tpotsia istaragana. Itaro, tpots pakchita potako, ovam da pishtachiya, atcha Apall koko. Ashiri shigtsa; korikiriatsis vayantsa tpotsia istamama.

¹⁶Nov magi kische, vatam Apall Titoa magu putsiaragova. Apallia vapparria atina. Tit nov tamatarparina ashiritam siyaa chinakiya; siyaa istamam zadkiya. ¹⁷Novsha istagcha táragori, Titsha mikiaro ayo táragiya. Vaana zadarago, kis ayo táragiya. Na vasina mosá nachiya siyapi. ¹⁸Ashiriya, Tit siyap nakcho, tpotspat llitaritpat iponiaro nachiya. An tpots kizporcha vanasiri. Isosomon zovalltanicha. Isosoa kok kapog tayaspatarago, Isoschich ichigoro anoa yasakanaya. ¹⁹Kapog yasayarosin, Isoschich tpots anoa tpotsi iposarsin, kamachtaraganaya Titoam viponshi. Ashiriya, kozizimon novsha siyash koskachori, ovshitsin novapat iponiar-

sin, Irosarinap korikia panamam nachillinaya. Iy irosarinshochia tpots pokiria istapani atoni, korikia vayachiniya. Ashkachoni, tpots Apallia vanasiriam inachillinaya. Vapparria Apaa, vatam istaragshava; táchillinaya. ²⁰Ashiriya, tpots novaa yotaritam inarodama atori, tpotsia masítónshoch tsibon machchina. Ashkachoni, korikia izooro tatsamoro Irosarinshoch vayachiniya. ²¹Apall novaa kis napachpa atori, vanasir takina. Misha, tpots novaa yotaritam inarodama atori, magipti takina. ²²Itaro, yov zovallini vanasiri anoa Titosh zaganchima. ¿Vanipaha nov nia paki? Oro vanasir istakiya; da sabaytakiya. Na siyamsha istamam kamaniragori, araginasha chinakiya. Siyaa kapog istamam zadkiya. ²³Tito novcha oro iponshi; oro siyash istako ancha. Misha, tsibonotam tpots zovallini zaganchima. Ovaatssin Isosomon zovalltamanicha. Isoschich tpots shaniyiarsin, anoa tpots iposaraganaya. An tpots Isosoa itsinsaro chinakanaya. Ashiri aship an tpots zaganchima. ²⁴Siyash koskatssin, siyaa vanasiri napagtsa; vanasiri istagtsa; chinagtsa. Ashkachinariasa, Isoschichin tpots siyaa yasachapsinaya. Papor zorko atiya táchillinaya. Napa vah korídshoch tpots Isoschichia kis chinakana, siyaa táchillinaya. Ashiri shigtsa, zovallia; chinagtsa.

9 ¹Ashiriya, siyaa irosarinshochia tpots Isoschichia istagtsa; korikiriatsis panagtsa. ¿Itaro anoa mayamaha kapog kamanchi kirakamona? ²vatom istamam sana zadaragsava. Nish Masítónash tsap kosaragori, masítónshochia nov táragina; Piy korídshoch yakat kirikshoch tpots an ichigorosin istamam kizpor zadkanaya irosarinshochiama, táragina. Sirotari minosh masach istayani táragsincha, nov táragina. Táragori, masítónshochsha anoa kis

mazinayarosin, Iysha istachtampariniya, táraganaya tpots zapani. ³Ashiriya, gichtariama atori, zovalliatsini siyap vasina zaganchima. Ashkacho, datoma narori, siysa vasina korikia vayapsa. ⁴Vasina vayakchos, novsha masíton-shochpat tpots koskachori, dosha pazichi; siysa dontam pazitssa. Itaro, gotani koskachoni, datori siy vayaros, kapogori pazimam varitariya. ⁵Da ashishtamam tpotsia vasina zaganchima. Koskatssin, korikiriatsis mapoyaros, vashonad vayagtsa, vatam ashchinipa táragsava. Ashirocha, kis vayayaros, da pachidkos, Apallsha siyaa kis napchintsa. Ashiri shigtsa.

⁶Mazinagtsa; chiy pakich tatsomkoch, pakchitam posakchi; katogshiamich pishtachiya. Itaro, chiy kapog tatsomkachoch, vchoa ichigoro chigakchoch, kapogtam posachchi; pishtats doncha. ⁷Ashikpaz shigtamtsa tpotsia istamama. Yovari sana zadaris anoa panagtsa. ¿Mayamaha pachinozpat panachich? ¿Mayamaha misigayaroch, Niava, vatam tamontakshava; táchich? An mantsircha. Magich kis panakoch, ancha vanasiri. Anogaziri zadkiya Apalli. Anomashia tpots Apall kis chinakiya. ⁸Ashkachos, Apall siyaa kapog istachiya. Istakcho, siyamsha da pishtachiya. Kisshapa tatssa. Shiaros, tpotsiam yosor istamam payotssa; istampaniri tatssa. ⁹Vatam Apall vaana atova;

Tpots istampaniri tako, pokiriam mago panako, anoa tpots da bizchina. Orotamari ovaa chinachillinaya, vatam vanasiriva; atcha Apall koko. ¹⁰Ashiriya, tpotsia istakos, tptotssa oro Apallia vapparía táchillinaya. Apall vaana siyaa istarago, katogtsiamis da pishtachiya. Siysa anoa yayaros, tpotsia istakos, araginasha Apall siyaa istakcho, anpatsha yosor

tpotsia araginasha istatssa. ¹¹Ashishtar ashkos, istampaniri tatssa; Apall oro siyaa istachintsa.

Ashiriya, siysa tpotsia istamam vayakos, iysha Irosarinap vayachinipa. Ashkachos, tpots zapan: Apaa, shiy kizpor istaragsha; ashiri vapparía, táchillinaya. ¹²Siy irosarinshochia tpots istakos, ovam pishtako anoa istamana istakiya. Itaro yovamad Apallia kapog vapparía táchillina anomad araginasha vanasiriya. ¹³Siyaa táchapsinaya; Apaa, Koridshoch Isosoa kok izooro magoanapaksinaya. Shiyaa magoanarag-sin, iyaa kis istaragana; Isoschichia ichigoro istakanaya, táchapsinaya siyaatsi. ¹⁴Táyarosin, siyam Apallpat tsiyatchillinaya. Siyaa kapog chinayarosin, kis siyam tsiyatchillinaya, vatam Apall siyaa magoanamam kapog istaragova. Siyaa arapchiatstatis kizpor chinachillinaya. ¹⁵Apallimari chiya istako ashtariya. Apall vaamari iyaa izooro istaragiya, vatam Isosoa iyam zaganiragova. Ashiri Isosomad oro vapparía atiniya Apalliatsi.

Ashiri Isoschichia korikpat istamam izooro kamaniana.

Mazinagadama Isoschichis; na minoatssha nov siyaa vanichintspa; magiatsis putsichintspa, vatam Isospotsia tayaspatapania kok ashpamatis payoksava.

10 ¹Nov Paportana; nov siyam Isostana vamachtashi. Natori Isos tamapari ashiro apill vaniakina. Isospotsia tayaspatapan novaa atanaya; Papor nish iyash tako, moxar tamapari ashiro takiya; vanimam ponikiya. Itaro arapiri tako, tsiyatssia kirakosh zaganko, magotari korak tamapari ashiro vaniakiya, novaa mago atanaya. Ashirita, natoma kirakosh

siyaa apill vaniakina. ²Ashiriya, novsha siyash koskachori, siy Isospots tayaspatampani kok vadari payokos, paptsa. Anoa tpots kachi pakori, kizpor vanichima. Nov gotazi ati vatam vizporiri tarova. ³Nov tptotstana. Donta kizpor takori, ashirita llitarit vizpori-riami tariya. Ashkori, varatakpez ashkina. ⁴Novanamoni vizporiri da tayaspataki; Apallimona vizporirini tayaspatakina. Apall vizporirini apallpotsia kok ichigoro kasikiya. Ashiriya, Isosoa kok tayaspatakori, Apallimon vizporirini tptsia chinash novamari kasirina. ⁵Tpots kizpor yasampani vaanatsi kok tayaspataksin, Apalliam kok kizporita toxaraksin, ashirita Apallimon vizporirini novamari kasirina. Tptsia magu putsiakori, magoa potakpez ashkori, tptotssha Isosoa kok magoanakcha. ⁶Ashiragori, machinavis tptsis Isosoa kok kapiatkos, oro Apallpata vizporirini kizpor vanichitsa. Ashiri paptsa tina; Isospotsia tayaspatampania kok payorintspa.

⁷Mazinagantsa; ¿mayamsha maachia-tsi kamiranatsta da magoanaksa? Itsinsaro magoanagtsa. Yovaa tpots nov kizportana Isosi vamachtashi ato anoa novsha magoa putsichima. Siy kizpor Isospan vamachtash takos, nov ashiritamana tatsamoroni takiniya atina. ⁸Isos vaanatsi vizporirini novam panaragiya. Anoa na kapog kamaniragina. Anomad ¿mayamaha nov pazichi? vatam zorkori atinava. Isos novaa kamachtarago, siyaa tayotaritamam kamachtaragiaha, da; siyaa istamam kamachtaragiya. ⁹Siyaa da mago tpoxtamam atina. Novanatsi koki kirakamon yadakori, itsinsaro yadaragina. ¹⁰Siy ashpatamtis novaa atssa; Papor kirakaa yadako, kok mago tpoxtakiya. Itaro, nish iyash tako, moxarpaz ashiro tsiyatkiya. ¿Ashiri chakaha Paporoa kok mazinantappo?

mag siy atssa novaatsi. ¹¹Mazinagtsa; nov tsibon kukoz payokiazi. Siyash koskachori, yovartatam kukiatsi yadaragi anoritam payokina; vanimamari siyaa chinakina.

¹²Itaro ichigoros mazinagadama; nov Isospotspat tayaspatampani yachamam da zadkina, vatam ov varitariaha. Ovshtisin vaanpatatin yachaksin, minoya korakav shitog, minoya magotari shitog ashkana. Magsharittsincha an tptsiti.

¹³Itaro, Apall vaana chiyaa kamachtako, anosh yasamam varitariya. Nov siyaa Isostana vamachtashi atori, nov siyaa, gotazi ati, da. Apall vaana novaa, kamachtarago, siyash kosaragina. ¹⁴Anoa yankiazi; tatsamoro chinakina. Apall novaa zaganirago, novma ichtaro siyash kosaragina. Kosiarori, novma Isosoa kok siyaa kamaniragina. ¹⁵Ovshtisin koshimoni kosiarsin, ¿antati vaanamon-tartaha vizporirini tayaspatakana? da. Llitaritamom tpts ovsh oro tayaspataksin, mago tatotspi atosin, kasipi atosin ashkana. Itaro, nov ashkiazi, da. Novma ichtaro siyash tayaspataragori, natsha siyaa ksotkina. Apill tayaspatat tayaspatat ashkina. Koridshoch izooro magoanpana atori ashkina. Ashiriya, siya izooro magoankachos, ¹⁶novsha araginasha minosh tsap tayaspatachima. Llitarit tpts kozizimon tayaspatako ashkiazi, da. Yap tpots Isosoa kok datoma tayaspatarana ab novsha tayaspatachima, vatam Apall vaana novaa kamachtaragova.

¹⁷Ashiriya, Apall vaana novaa kis napko anomon nov magi kisha. ¹⁸Gotich chantari ogirtapi atoch, Nov vanasirtana; tptsia kasiki, vatam Isosoa kok tayaspatampanava, atoch, ancha yotaritcha. Itaro Apall vaana chiyaa kamachtako, kis napko, varitacha; ancha vanasiri.

11 ¹Mazinagantsa; novanatsi kamankori, tpts magsharitamapari ashiro tsiyatchima. Ashirita,

novanatsi kamanchintspa. ²Donta zadkori, ashirita kamanchima, vatam nov siyaa pachidkinava. Nov siyaa Isosoa kok kamaniragori, siyaa magoanaragos, nov siyaa Isosoatsimari chinamam vaniakina. Maachiatstanari ashiro, Isosoam vayamadamariniampaz ashiro siyaa inaragina litaritaa da magoaz chinamama. Nov siyaa Isoschichiam izooro inamam zadkina. ³Llitarit tpots siyaa tamapigatpa, Isosoa itotstapa atori, siyaa kapog pachidkina. Sirotamasa Yashigu Atágariniatsini vizall Íparinia tamapigarago ashtatpa atori siyaa pachidkina. Itsinsaro Isosoatsimari chinapana atori, siyaa pachidkina. ⁴Itaro nov siyaa yasaktana; kukoza litaritamashia oro kis mazinaksa. Tpots siyash kosko, Isospotsia kok kamankacho, siyaa kispari mazinatssa. Misha, apallpotzia vizporirini siyam vayakinari, ksatampa yatssa. ¿Mayamshta anoa kuko z mazinachich? ⁵¿Nitati nov anpat tpots varitariazi? Kizpor tayaspatampantana atitatssin, nov anoa kasirina, vatam mago atanava. ¿Antati nov tamakparina ashiriaha? ⁶An tpots tamapari ashirori kizpor tsyatssipan donta nov takori, itaro nov Apallia kok izooro yasakina. Siyaa oro tayaspataragori, Apallia kok izooro kamaniragina; vazariatsiri tayaspataragina.

⁷Sirotamasa siyash kosaragori, Isosoa kok tayaspataragori, tpotsimon da kchitaragina. Gotariti Isosoa kok tayaspataragina; tovapada da táragina. Mchachpazi ashirori taragina; novanamontari vizporiri kchitaragina. Siyaa kapog istapi atori ashiragina. ¿Nitati an yotaritaha? da. ⁸Isoschich arapich tpots novaa istaragosin, novsha siyash istamam kosaragina. Anoa tpots shochikpaz ashiragina. Anoa paziktati atina, vatam novaa istaraganava. ⁹Itaro,

siyash taragori, novam maachi pishtaragiya. Novam pishtaragita, da siyashchia tpots minamtiyam tamontaragina. Itaro masitonshoch tpots kosiarsin, novaa yosor istaragana. Orotari nov siyaa anosh da tamontaragina; ayamtati siyaa tamontachtamtazi. ¹⁰Isos vaana novaa yasakiya. Nov gichkiazi; itsinsaro kamankina. Siyash kirikshochis tsap oro Isosoa kok gotariti tayaspatachina. Ayamtati siyaa istada táchiazi. Mashkachinariana pazichparina; itaro da mashkori, pazichiazi, dabaria. ¹¹¿Nitati natsarpatazi gotariti siyaa istaki? da. Nov siyaa kapog chinakori, gotariti tayaspatakina. Apall vaana novaa magi yasakcha.

¹²Ashiriya, siyash oro gotariti tayaspatakina; orotaritam gotariti tayaspatachina. Ashkachori, ovshtisin tayaspatampan litaritamashi novash tominam izooro pinasachpasinaya, vatam korikia potapani atosin tayaspatakanava. Ovshtisin novaa: Paporpata tatsamkini, vatam korikia potaktamtava; táchapsinaya. Ab tárodama atori, gotariti oro tayaspatakina. ¹³An tayaspatampan tamapigampancha. Isospotscha tayaspatampani. Magotari vaanatstari Isospaz vamachtashi ashiro inakana; nov Isostana vamachtashi mago atanaya, ¹⁴vatam Yashigu vaanatstamari Apallimpaz vasodorori ashiro inakova. Oro vanasirimshiam kizpor kinakiya chiya tonazadamama. ¹⁵Tpots Yashigoa kok payokana an ashiritamcha; kizpor vanasiriam kinakanaya. Apallimpaz kok kamani-mapaniam ashiro kinako ¿anoa mayamaha ponichich? Itaro, an tpots ashkatssin, Apall vaana yasayaro vanichiya.

¹⁶Ashiriya, nov siyaa yosor táchintspa; novanatsi kamankori, tpots magsharit tamapari ashiro novanatsi goti ogirtach-

tamana; goti tamasigakpaz ashchitamma. Ashirita, novaa koki mazinagantsa, vatam kaapa da magshartinava; goti atina. ¹⁷Novanatsi ogirtakori, Isos tamapari ashiro nov da tsiyatkina; tpots magsharit tamapari ashiro tsiyatchima. ¹⁸An tpots, Isospots tayaspatampan zapan vaanatsi ogirtaksin kamankana; ashchitamma nova; nov ashipi ashiritamti magsharitz paz ashirori novanatsi kamanchima. ¹⁹Itaro, siy magis kapogoros Isospotsia kok mazinaksa. Ashiriya, siyaa novaa mazinachpasa, vatam siy ab magis kapogorova. Ovaatssin kis chinakos, ashiri novaatssha nayanigasidama. ²⁰Tpots tamarima ato anoa siyaa mazinayaros, nayaniksa; ashiri nov kamankori novaatssha nayanigtamtsa. Siyaa vaama mochchori inakchosin, siyaa anoatsta mapiykos, ova kok kis mazinaksa. Siyaa shochikchosin, misha siyaa potakchosin, misha siyaa tamapigakchosin, misha siyaa yotaritam inakchosin, misha siyaa pzkoakchosin, ashirita mapiykos, ova kok kis mazinaksa; anoa tpots nayaniksa. Ashiriya, novaatssha nayanikos pakchita mazinagadama.

²¹Na kapog paziyana; nov magi donimoncha. Nov kizpor da taragori, da pzkoaragina. ¿Tamakiazi da nov ashiragi? Itaro vatsta; goti atina. Itaro, ashirita mazinagtsa; an Isospots tpots vaanatsi ogirtamam zadkosin, itaro novshat novanatsi ogirtamam yasaktamana. Itaro, nov magsharit tamapari ashiro tsiyatkina. ²²Ovshtisin kizpor otiayschochtana vaanatsi atanaya; itaro novsha ashiritamana. Ovshtisin nov Akóparinchichtana; Apalltana tiptsiri atanaya; nov anchichtamana. Ovshtisin nov Áparámarinchichtana; Apallia kok kizpor chinaktana atanaya; nov anchichtamana. ²³Ovshtisin Isostana

vamachtashi atanaya; ashiri ¿nov maypannarina? Novnashacha araginashtina Isostam vamachtashinashtina. Ashirita, nov araginashta Isos vamin kiyog kachiykina. Magsharitz paz ashiro nov tsiyatkina; ashirita kamanchintspa. Novamari kasirori, Isosoa kok kapog kamaniragina. ¿Vanipaha novaa tomanaragana? ¿Vanipaha novaa pzkoaragana? ¿Tsipamam vanipaha kataxiragi? ²⁴Otiayshoch novaa pzkoaragosin, yasinpat 39 novaa pzkoaragada. Vashonad zamiatpata novaa pzkoaragana. ²⁵Anomonsha orómanshoch tpots minopsha tsap novaa yasinpat shinabaragana. Vashonad novaa tochip ivasigaragana. Novaa patobchipat pachamana pacharagana. Mososh kapogosh xiragori, tochip bot patagarago chimoragina. Chimoragori, minam zar vazoran psanpata yasinamon pachipiarori, moziztar ashiragori, goti tarasiaragina. ²⁶Kapog xiragori, ¿vanipaha tsipatsia kataxtaria? Misha, kog kobiyarago kizpor zav ashiragiya. Misha, vashchirsha novam tsagaragana. Misha, novanchichta tpots novanatsi pachamam zadaragana. Misha, arapich tpots pachamam zadaragitamanaya. Misha, yaktash tpots novaa kaxayiarsin, pachamam zadaragana. Misha, arap oposap kiyog kachiyaragina. Misha, mosash kiyogotam kachiyaragi. Misha, Isospots tpots novaa tamapigaragana. ²⁷Misha, Isosoa kok kapog mapiaragori, kapog kiyogotam kachiyaragina. Misha tpots vamin zapan mats mosáragori tarasiaragina. Misha, zapantam mariz kayataragina; sachitaragtamana. Misha, Isosoa kok kapog mapiaragori, zapan magoragina. Misha, zapiaragitamana; minomon kiyog kachiyaragina. ²⁸¡Maya! ichigoro zar vah mapiashish novam tariya; kizpor mapiakina. Isoschichiam

vamin nov magi kizpor mapiaktamana.
²⁹Isoschich tpots Apallia kasako, novsha magi mantsakina. Isoschich tpots Isosoa kok paziko, novsha kizpor magi mantsaktamana. ¿Antati anin nov tamakparina ashkazillinaha?

³⁰Nov yovamon da kizpor taki, yovamon kiyog kachiyki anoatsim nov kamanimam chinakina. ³¹Apall vaana novaa magi yasakcha. Nov gichkiazi, da. Apallcha orotamari takiya. Isos iy korakarini vapariya. Apallia oro chinachinipa iya. Ovsha novaa magi yasakcha. ³²Mazinagantsa; sirotari nov Tamáskosh yakat taragina. Koraksha Arítas sora *gobnadoro* ab zaganiaro, ovsha *gobnador* novaa potamam zadaragiya. Ovsha *gobnador* vaanatsi vasodoror kamachtarago, novaa potamam shítogashinog tsagaragana. ³³Kamogamam tpotssha novaa istaragana. Novanamoni vizporiri pinasaragtana. Tpots yaktarinshini vatadponnog ivaz novaa yarovaragada. Tsobosh kapogosh izaroyarodan, sokamon kanabiptatatao, yarovavatara ashiragada. Shiarori, aragirisha sovaragina. Anpor Isosomon vamin kiyog kachiyam chtaragina.

12 ¹Ovshtisin Isospots tayaspatam-pan oro vaanatsi magotari ogirtaksin, pamazorago anoa kis kamankanaya. Nov ashkitamana; novsha pamazoamana pamazoktamana. Ashkitati, itaro novsha anoa da kamankina; Isoatsimari kok kamanimam zadkina. Donta zadkori, donta siyaa Apalliam istako, ashirita novanats-tatam pakchim kamanchintspa, vatam ovin ashkanava. ²Mazinagantsa; na 14 masach toshirago, nov oro Isosoa magoanaragi anpor maachi paragina. Apall vaana novaa yamaragiya. Kanidap tochparinsho vaanshortari novaa vayaragiya. Kaniatsimtainava yamara-

gadanava. Dontati ashiro, notsiptazina nava yamaragova; yasariazi. Apall vaana yasakcha. ³Nov anoa yasamam pinasakina. Itaro Apall vaana novaa yamarago, vaana yasaktamtaya.

⁴Ashiriya, Apallosk kosiarori, tsiyatssia kizpor vanasiri mazararagina. Apall vaana kamaniragiya. Itaro chiy tpotsich anoa tsiyatamam pinasakchi. Nov anoa kamanimam izooro pinasaktamana.

⁵Itaro, yovaa Apall vaana novaa ashirago anoa kamankori, anomon da novanatsi ogirtakiazi; mapiyktana. Novanatsi kamankori, yovaa mizporishisha taki anoatsim kamanimam chinakina. ⁶Miroasill tpots tamapari ashiro tamasiyarori da tsiyatchina, vatam zorkori atinava. Ashirita zamarori tachima. Novanamoni tarashi novaa kamiran yasatssa. Novamon koki yasamam varitartamcha. Itaro, novanatsi zapan kamankori yovaa zapan pamazomaztari anoa, siyaa novaa ponirostakchos, ancha yotaritcha. Ashiri natori kasachima; anoa vatsitparia atina.

⁷Ashiriya, zapan paragori, Apallsha anomon novaa shanamontari magish tatilla; novamonari magish tatogcha ato novam vaniashish kasaragiya. Da novanamona vizporiri magi tatomama, Yashigu notsiatsi kiyog yachamam kas yotamam novash vayaragiya. Novaa kiyog yachat yachat ashkiya. ⁸Novsha Apallpat tsiyatiarori, tchiyada taragina. Tochip masharagori, ashirita da tchiyaragiya. ⁹Itaro, novaa kapog istarago, novaa taragiya; Vapa, ¿mayamsha araginasha zadaksha? vatam nov shiyaa kizpor chinakina. Mizporish takosh, novsha vizporirpati shiyaa izooro istachima, taragiya Apalli novaatsi. Ashirocha, natsha mizporirshimoni nov magi kisha; kiyog kachiyki anomon magi kisha. Ashkachori, Isos

vizporirini novash kizpor takiya; novaa izooro istakiya. ¹⁰Ashiriya, Isosomon vamin kiyog kachiykori, nov magi kisha. Nov mizporish takori, misha tpots novaa yotaritam inako, misha maachi kapog pishtako, misha tpots novaa pachamam zadko, misha kiyog kachiykori, aship ashki anomon nov magi kisha. Vatam mizporish taktati, itaro Apall vizporirini novash kapog takova.

¹¹Ashirocha, novanatsi kamaniragori, magsharit tamapari ashiragina. ¿Nitati novana zadkori atiazi? da. Isospots tayaspatampan novaa yotaritam inaragana. Itaro siya da novaa tapachidaragsa. Siy donta novaa tapachidamam zadaragos, itaro novantarisha da sabaytaragina. Ovshtisin Isospots tayaspatampan vaanatsi vizporiam inakanaya. Kizpor tayaspatampantana atitatssin, nov anoa kasiktana. Novatati dontati varitakori, ashirita nov anoa tpots nigat takiazi, da. Novaa kasikazillinaha. ¹²Siro nov siyash taragori, siy novaa tarashi ichigoros yasaragtischa. Isos vamachtashi tsinsampan takana anpat tatsamoro paragtischa. Tpots novaa kiyog yacharagitatssin, itaro da sabaytaragina. Apall vizporirini novam istarago, siya yovaa ashiragi anoa paragos, ponirostaragsa. Anomon siy novaa yasaragsa; siy Isosomon kizporitam taragsa. ¹³¿Antati Isoschich lilitarit siyaa kasikazillinaha? ¿Nitati siy tsipasaha takis? da. Vatam siy paragsava. Nov siyaa tayaspataragitati, itaro nov siyaa korikriptis novaa istagadama da táragi; siyaa da tamontaragi. Ma, anomonparia siy novaa da chinaksa. Nov Isospots tamaparia da ashirori korikiriatsis da mashiragina. Kaapa nov siyaa tayotaritaraginariana ashiro magi mantsachparina. Itaro siyaa chinaragori, nov da tayotaritaragina.

¹⁴Mazinagantsa; na nimon tochparini napkatori siyaa tamontachiazi; nov siyaa istada táchiazi, dabaria. Nov siyaatsimari zadkina. ¿Antati korikirigziiazis zadki? dancha. Nov siyaa gotariti istamam zadkina Apalliamamta. Oro chiy tpotsich ipariatsich istatarchi. ¿Antati llor vaparia martatariaha? da. Ashiritamana novaya. Nov siyaa ipartana. ¹⁵Ashiriya, nov siyaa magi kis istachintspa. Siyamon kaminis tsipaniatstati da pachidki. Tpots novaa anomad natsaktatssin, itaro novsha siyaa araginasha chinachina. Ashiri ¿mayamadshata novaa niraksa? táshina. ¹⁶Donta nov siyaa tamontaragori, ovshtisin Isospots tayaspatampan novaa mag atanaya; Papor tamapigako ashkiya. ¿Vanipaha siyaa shochik? Pokiriamav istaktatis, itaro Paporsha vaamatari yat yat ashikcha, novaa gichkosin atanaya. ¹⁷¿Yap nov siyaa shochiragina? Nov tpotsiya siyap zaganiragori, ¿antati ovshtisin siyaa shochiragana? dabaria. ¹⁸Nov Titoa tamontaragori, shiyap zaganiragina. Misha, zovalliatssini minoatstam Titosh zaganiragtamana. ¿Nitati Tit siyaa shochiragiaha? da. Novapat minamari magoaz tominkiniya; misha iy Isosshomari tachitkiniya. ¿Yapiaha siya yayaros iyaa yotaritam inachisa? ¹⁹Na novanatsi kapog kamaniragori, magishis chinaragos, táragsapa; Papor vaanatsi tapachidakiya; korídshoch novaa chinapada atopa atiya, atpasa siyaya. Anoom atiazi, da. Nov siyaa magis putsimam táragina. Isosoa izooro magoanpana atori, novanatsi izooro kamaniragina. Apall vaana novaa yasachiya. Siyaa tapachidapi atori kamaniragina. ²⁰Apaz nov siyash koskachori, yotaritshishia zapan pakori, ¿novsha tamachiazi? Vanasiriaha napchia, dabaria. Vapaz siy vad sanpata

varatattagat ashkos, novaa ipazachpasa. Misha tpotsia siyamari kasimam zadkos; misha tsiyantakos; misha tpotsia istamam da zadkos, nirkos, itaro sanatstamari napkos; misha tpotsiatssha yotaritam inakos; misha tpotsia yotarit tsiyatkos; misha siyam kasikastar ashkos; misha mantsir takos, vapaz nov anoa siyaa mazinakchori, novsha kapog pazichparina. ²¹Ashkachinariasa, siyash yosor koskachori, siyamad kaminis araginasha pazichima, vatam Apall novaa tayaspatampaniam inaragova. iMaya! yotaritshishia kapog pakiarori, kapogori tanochparina. Zapanis Isosoa kok kapiataragos, shiaros yotaritshishia vad chinakos, da kasakos, novsha tanochshaparina; pazichshaparina. Vad yotarit takos, yotarit patatkos, da pazikos, anoa nov pakori kizpor magi mantschina.

13 ¹Mazinagantsa; na tochparini siyash napchintsa. Itaro koskachori, yotaritshishpania izooro vanichima. Tsibon tpotsi, dontati ashiro tochip tpots vaanadari minamari kukoz kamankatssin, in tpots piy yotaritshishia ashiragiya tákcho, ashiri anoa nov mazinayarori, tpotsia vanichima. ²Siro siyash tsibonorini naparagori, yotaritshishpaniatssha: Yosor koskachori, paptsa; donna yotaritshishia kasakchos vanichintspa, táragina. Natsha araptati takori, yadamosh siyaa ichigorori vaniakori, anoatsim atashina. Yotaritshishpan tpots da minamtiyam kamogchillinaya. Ashiri paptsa atashina. ³Siy novaa izooro yasamam zadaragos, ¿Kamapa Isosoa vizporirini payokiya? novaa táragsa. ¿Siy mayamsha atssa? Vapaz yotaritshishia vad kis payokos, novsha siyaa Isospat vizporirini kizpor vanichintspa. ⁴Siro Isos vaanatsi kanasara, mizporishpaz ashiro kinarago, iyamad yotaritshishirini yasinamon

tsiparagiya. Itaro, natsha Isos na vaamari kizpor takiya. Ichigoro iyaa kasikiya. Nov ashkitamana. Isosoam tayaspatampan kinaragori, Isos tamapari ashiro mizporishpaz ashirori kinakina. Itaro, siyaatssha istakori, Isos tamapari ashiro vizporirpati takina, vatam vaanatsi vizporirini Isos novam panaragova. ⁵Ashirocha, nov siyaa atashina; sana sagtsa. Sanatstatam ¿Kamapa izooriana Isosoa kok payokori payokina? atos sagtsa. Sanatsi yachagtsa atina. Daba yasasa, zorkinarich magoankoch, Isos chiyash notsich takiya. ¿Kaapa siyash Isos tak? siyaa atáshina. Siyash donna kaapa tako, ashiri kaapana siy Isoschichiazis, dabaria. ⁶Ashiriya, siy novaa izooro yasagtsa; ¿kaapa Paporosh Isos tak? tágadama. Isos vaanpata vizporiri novash izooro tariya siyaa istamama. ⁷Apallpat siyam tsiyatkina; Koridshoch tpots tayotarit-tapa; yotaritshishia yarchillinpa, tina. Vasina yarkinariasa ashios, novsha siyash koskachori, Apallia vizporirini novamon yachachiazis, dabaria. Novsha mizporishpaz ashirori tachima. ⁸Nov oro Apallia kok tayotaritamam da zadki; anoatsimari kok siyash istamam zadkina. Ov kok zoromaricha. ⁹Ashiriya, sana vasina yariaros, nov mizporishpazi ashirori koschima. Ashiriya, nov magi kisshaparia. Minamari nov zadkina; siy Isosoa izooro magoankos, an novam vaptacha ashkatasa. Siyam Apallpat tsiyatkori, koridshoch Isosoa izooro magoanchillinpa Apallia atina. ¹⁰Ashirocha, anoam na siyam yadakina. Siysa na vasina yarkinariasa, novsha koskachori, dosha siyaa kiyog yachachintsa. Isos vaanatsi vizporirini novam panaragita, itaro siyam istamam ashiragiya; da siyaa tayotaritamam kamachtaragiya. Ashirocha siysa vasina yaragtsa siyaa atashina.

¹¹Ashiriya anoatsimari kukoz siyaa kamanpi atori yadaragina. Magis kis tagtsa. Yotaritshishiriatsis yaragtsa. Novaa koki payogtsa. Magoaz minamari payogtsa. Mapiyros tagtsa. Ashkachos, Apall vaana siyaa kis chinachiya; magiamis mapiym panachintsa. ¹²Sanpata chinakos, Apallimon pchipogtsa, vatam siy oro ashtarsava. ¹³Nish tpots Isoschich siyaa ichigorosin chinakanaya.

¹⁴Isos vaana siyaa napchiya, vatam iyaa ksomish chinaragova. Isosoa iycha korakarini. Apallcha Vipaya. Apalltam siyaa ksotachpa, vatam iyaa chinako, Vipaa iyam zaganiragova. Apalltam Vani siyaa ksotchiya, vatam iyaa Isoschichiamani ichigoroni inaragova.

Ashiri vapparria. Paportana.